

आकाशवाणी

- 1 महाराष्ट्र च नमैं चुनोए दे विधायकें कन्नै मिलने दे मगरा बीजेपी विधानमंडल, पार्टी दे नेता दे नांs गी मुकदा रूप देने लेई अज्ज बैठक करग।
- 2 भारतीय अंतरिक्ष अनुसंधान संगठन इसरो श्री हरिकोटा थमां प्रोबा-3 मिशन उपग्रहें गी लांच करोग।
- 3 नोसेना दिवस 2024 अज्ज मनाया जा'रदा ऐ। भारतीय नौसेना दे आपरेशन ट्राइडेंट ते ओहदी उपलब्धियें गी चेता कीता जा रदा ऐ।
- 4 ब्रिटेन नै संभावित हमले दी चेतावनी दे बारें च बंगलादेश दी यात्रा सरबन्धी नमीं एडवाइजरी जारी कीती।
- 5 दक्खन कोरिया दे राष्ट्रपति नै देसा च लाया गेआ आपात मार्शल लॉ हटाने दा ऐलान कीता।
- 6 पिछले बारी दी चैंपियन भारत मलेशिया गी दुए सेमीफाइनल मैच च 3-1 कन्नै हराइयै पुरुष हॉकी जूनियर एशिया कप दे फाइनल च पुज्जी गेआ ऐ।

<><><><><><>

BJP-MLA

महाराष्ट्र च भारतीय जनता पार्टी दे नमैं चनोए दे विधायक अज्ज मुम्बई च अपने लीडर गी चुनने लेई बैठक करडन। पार्टी नै खजाना मंत्री निर्मला सीतारमण ते गुजरात दे साबका मुखमंत्री विजय रूपाणी गी पर्यवेक्षक दे तौरा पर नियुक्त कीता ऐ तां जे विधायकें गी अपने विधायिका पार्टी दे नेता चुनने च मदद थोई सकै। नमैं मुखमंत्री कल 5 बजे दक्खणी मुम्बई दे आजाद मैदान च प्रधानमंत्री नरेंद्र मोदी हुंदी मौजूदगी च सगंध लैडन। भारतीय जनता पार्टी दे सीनियर नेता ते साबका मुखमंत्री औहदे लेई पैहला दावेदार मन्नेआ जंदा ऐ। बीजेपी दी अगुवाई आहली महायुति गठबंधन नै हाल च गै होए दे महाराष्ट्र विधानसभा चुनाए च जबरदस्त जित हासल कीती।

<><><><><><>

## ISRO

भारती अंतरिक्ष अनुसंधान संगठन - इसरो अज्ज यूरोपी अंतरिक्ष एजेंसी दे प्रोबा-3 उपग्रह गी कक्षा च लेई जाने आहले प्रक्षेपण यान पीएसएलवी-सी59 दा प्रक्षेपण करोग। श्रीहरिकोटा दे सतीश धवन अंतरिक्ष केन्द्र थमां एह प्रक्षेपण संज्ञां 4 बज्जियै 8एं मिंटें पर होग। प्रक्षेपण लेई पुट्ठी गिनतरी कल बड्डलै 2 बज्जियै 38एं मिंटें पर शुरू होई ही ते एह बवस्थित ढंगै कन्नै चलै करदी ऐ। इसरो दी बवसायिक शाख - न्यू स्पेस लिमिटेड गी यूरोपी अंतरिक्ष एजेंसी थमां एह ऑर्डर मिलेआ हा। प्रोबा-3 यूरोपी एजेंसी दा कक्षा निरूपण मिशन ऐ। प्रोबा-3 अंतरिक्ष दी तय कक्षा च पुज्जने परैन्त एह द'ऊं उपग्रह च बंडोई जाहग। एह उपग्रह सूरज दे प्रभा-मंडल, एहदे आले-दोआले दे वातावरण, अंतरिक्ष दे मौसम ते सौर ब्लाउ दा शोध करडन।

<><><><><><>

## Navy-Day

अज्ज नौसेना दिवस मनाया जा'रदा ऐ। भारतीय नौसेना दी भूमिका ते उपलब्धियें गी मान्यता देने आस्तै हर बरे 4 दिसंबर गी एह दिवस मनाया जंदा ऐ। बरे 1970 च अज्जै दे दिन आपरेशन ट्राइडेंट दौरान भारतीय नौसेना नै PNS खैबर सने पाकिस्तान दे 4 पोत डोब्बी दिते हे। इस अभियान च सैकड़ां बद्दे पाकिस्तानी नौसेना कर्मी मारे गए हे।

<><><><><><>

## Prez. Murmu

राष्ट्रपति द्रौपदी मुर्मू अज्ज बड्डलै पुरी दे 12मीं सदी दे श्री जगननाथ मंदर दा दौरा करडन। दर्शन दे मगरा ओह पुरी च गोप बंधु आयुर्वेद महाविद्यालय दी 75मीं बरसी दे जश्न दी शोभा बधाडन। राष्ट्रपति मुर्मू जेड़ियां भारतीय शस्त्र बलें दिआं सर्वोच्च कमांडर बी न, अज्ज दपैहरी पुरी दे ब्लू फ्लैग बीच पर नौसेना दे चीफ एडमिरल दिनेश के त्रिपाठी हुंदी मेजबानी च मुख परौहने दे तौरा पर नौसेना दिवस च शामिल होंगन।

<><><><><><>

## UK Bangladesh

ब्रिटेन नै बंगलादेश च आतंकवादी हमलें दी शंका गी दिक्खदे होई जातरा मतल्लक नमीं सलाह जारी कीती ऐ। ब्रिटेन दे विदेश, राश्ट्रमंडल ते विकास दफ्तरें इक चेतावनी च आखेआ ऐ जे विदेशी नागरिकें दिएं घुम्मने आहली थाहें सने, मती भीड़ आहली थाहें, धार्मिक थाहें ते सियासी रैलिंग पर आतंकवादी हमले होई सकदे न। सलाह च इब्बी आखेआ गेआ ऐ जे बंगलादेश च किश कट्टरपंथी गुट इस्लामी विचारधारा थमां बक्खरी सोच रक्खने आहलें गी निशाना बना करदे न। उत्थे अल्पसंख्यक धार्मिक समुदायें पर आतंकवादी हमले होए न ते पुलस ते सुरक्षाबलें गी बी निशाना बनाया जा करदा ऐ। ब्रिटेन नै जुलाई ते अगस्त च बी बंगलादेश दी राजनीतिक स्थिति दे बारें च आखेआ हा जे उत्थे व्यापक हिंसा होई ऐ जेहदे च केई लोकें दी मौत होई ते केई जने जख्मीं होए न।

<><><><><><>

## South Korean Emergency

दक्खन कोरिया दे राष्ट्रपति यून सुक येओल होरें आपात मार्शल लॉ हटाने दा ऐलान कीता ऐ। मंत्रिमंडल नै आपात दी घोषणा दे तकरीबन 6एं घैंटें परैन्त इसी हटाने दे प्रस्तास गी मंजूरी देई दिती। संयुक्त सेना प्रमुखें इस गल्लै दी तसदीक कीती ऐ जे सब्बै सैनिक वापस उट्ठी गे न ते सामान्य स्थिति ब्हाल होई गेई ऐ। दक्खन कोरिया च बरोधी दल डेमोक्रेटिक पार्टी दे इक नेता नै मार्शल लॉ दी घोषणा दे बाद राष्ट्रपति हुंदे पर देशद्रोह दा आरोप लांदे होई तुरत औहद्धा छोड़ी देने दी मंग कीती ही। एहदे शा पैहले चिरें रातीं टेलीविजन संबोधन च राष्ट्रपति होरें उत्तर कोरिया दी साम्यवादी ताकतें थमां राश्ट्री दी सुरक्षा ते राश्ट्र-बरोधी तत्वे दे खात्मे लेई आपातकाल गी जरूरी करार दिता हा।

<><><><><><>

## Tiger Reserve

केन्द्र सरकार दी मंजूरी दे बाद रातापानी, मध्यप्रदेश दा 8मां टाईगर रिजर्व खेतर घोषित कीता गेआ ऐ। मध्य प्रदेश दे मुखमंत्री डाक्टर मोहन यादव होरें आखेआ ऐ जे एह मध्य प्रदेश लेई इक बड़दा तोहफा ऐ ते हून राज्य असल मायने च बाघ-प्रदेश बनी गेआ ऐ। मुखमंत्री होरें इस उपलब्धि लेई प्रधानमंत्री नरेन्द्र मोदी हुंदा

धन्नवाद कीता ते आखेआ जे मोदी होरें सदा गै मध्य प्रदेश गी मती तरजीह् दिती ऐ।

<><><><><><><><>

## RNU Raising Day

आकाशवाणी दा क्षेत्रीय समाचार एकांश जम्मू औंदी 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश केई सारे कार्यक्रमें दा आयोजन करै करदा ऐ। स्थापना दिवस आले रोज 6 दिसम्बर गी बड्डलै साइडे 9 बजे, 30एं मिंटें दा इक विशेष कार्यक्रम प्रसारत कीता जाहग जेहदे च क्षेत्रीय समाचार एकांश दी भूमका, जिम्मेवारिएं ते कम्म करने दे तौर-तरीकें दे अलावा, इत्थे कम्म करी चुके दे अधिकारिएं कन्नै गल्लबात बी शामिल होग। एहदे अलावा संझा 7 बजे बी 15 मिंटें दा इक विशेष कार्यक्रम प्रसारत कीता जाग जेड़ा इस मौके पर स्हाड़े श्रोताएं ते जम्मू-कश्मीर दिएं नामवर हस्तिएं आसेआ भेजी जा'रदिएं शुभ कामनाएं पर आधारित होडन।

अपने कर्मिएं दी हौसला-अफज़ाई लेई, ऐकती स्थापना दिवस दे मौके पर उनें'गी सम्मानित बी कीता जाहग जिंदे च 2024 ब'रे दे बेहतरीन समाचार सम्पादक, डोगरी ते गोजरी दे बेहतरीन समाचार वाचक ते अनुवादक, बेहतरीन जिला संवाददाता ते जनरल स्टाफ श्रेणी च बेहतरीन कर्मी दे सम्मान शामिल न। इस मौके पर 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैहयोग ते जोगदान देने आहलें गी बी सम्मानित कीता जाहग।

<><><><><><><><>

## Hockey Junior Asia Cup

पिछली बारी दी चैंपियन भारत नै कल रातीं ओमान दे मस्कट च पुरुष हॉकी जूनियर एशिया कप दे फाइनल च दाखल होने लेई दुए सेमीफाइनल मैच च मलेशिया गी 3-1 कन्नै हराया। भारत नै दिलराज सिंह दे 10में मिनट च रोहित दे 45में मिनट च ते शारदा नंद तिवारी दे 52में मिनट च गोल दे जरियै फाइनल च अपनी थाहर पक्की

करी लैती। भारत दा मुकाबला अज्ज फाइनल मैच च पाकिस्तान कन्नै होग।  
पाकिस्तान नै पैहले सेमीफाइनल च जपान गी 4-2 कन्नै हराया हा।

<><><><><><>

## **Handball**

एशियाई महिला हैंडबॉल चैंपियनशिप च अज्ज मेजबान भारत दा मुकाबला ग्रुप-बी दे  
दुए मैच च ईरान कन्नै होग। मैच नमीं दिल्ली दे इंदिरा गांधी इन्डोर स्टेडियम च  
संझां 6 बजे थमां शुरु होग। अज्ज दे होरनें मैचें च हांगकांग दा मुकाबला जपान  
कन्नै, सिंगापुर दा चीन कन्नै ते कजाखस्तान दा कोरिया गणराज्य कन्नै होग। ग्रुप-बी  
दे शुरुआती मैच च कल भारत नै हांगकांग गी 31-28 कन्नै हराया हा। भारत हैंडबॉल  
प्रतिस्पर्धा दी मेजबानी पैहली बारी करै करदा ऐ। इस मुकाबले च एशियाई महाद्वीप  
दी 8 टीमां हिस्सा लै करदिआं न। इस प्रतियोगिता दिएं अक्वल दर्जे दिआं 4 टीमां  
अगले बरे नवम्बर ते दिसम्बर च जर्मनी ते नीदरलैंड्स च होने आहली आईएचएफ  
महिला हैंडबॉल विश्व चैंपियनशिप 2025 लेई क्वालिफाई करडन।

<><><><><><>